

IKA-APAT NA LINGGO: Kapayapaan

+ Sa Ngalan ng Ama at ng Anak at ng Espiritu Santo. **Amen.**

Kapuri-puri na tumatanglaw sa ating mga puso ngayon at magpasawalang hanggan. **Amen.**

PAGBASA NG SALITA NG DIYOS (Lucas 1:26-38)

Ang Mabuting Balita ayon kay San Lucas.

Tugon - **Papuri sa'Yo Panginoon.**

“Makinig ka! Ikaw ay maglilihi at manganganak ng isang lalaki, at siya'y tatawagin mong Hesus. Magiging dakila siya, at tatawaging Anak ng Kataas-taasan. Ibibigay sa kanya ng Panginoong Diyos ang trono ng kanyang amang si David. Maghahari siya sa angkan ni Jacob magpakailanman, at ang kanyang paghahari ay walang hanggan.”

Ang Mabuting Balita ng Panginoon

Tugon - **Pinupuri Ka namin, Panginoong Hesukristo.**

PANALANGING PAGKALAHATAN

(Sanggunihin ang unang Linggo ng Adbiyento)

PANALANGIN NG PAGBABASBAS

Ama naming makapangyarihan, kasihan Mo kami ng Iyong pagmamahal upang kaming nakabatid sa pagbabalita ng anghel tungkol sa pagkakatawag-tao ng Anak Mo ay makapakinabang sa Kanyang pagpapakasakit at pagkamatay sa krus sa pagsapit namin sa pagkabuhay Niya sa langit sa pamamagitan Niya kasama ng Espiritu Santo magpasawalang hanggan. **Amen**

Sisindihan ang Ikaapat na kandila (Iila) sa Korona ng Adbiyento

PANGWAKAS

Nawa'y patnubayan ng Liwanag ni Kristo tungo sa kaganapan ng Kanyang Kaharian magpasawalang hanggan. **Amen.**

PAGNINILAY AT PAGBABAHAGINAN

Sasagutin ng bawat miyembro ng pamilya

Para kanino mo ini-aalay ang panalangin para sa kapayapaan?



PANALANGIN PARA SA PASKO



+ Panginoon namin at Tagapagligtas, binabati po namin Kayo sa araw ng iyong pagsilang. Ang iyong kaluwalhatian, ay hindi matatawaran. Ikaw ang dahilan ng kaligtasan ng buong mundo. At ikaw ang kasama ng Amang Diyos sa paglikha ng lahat ng bagay.

Maraming salamat, Hesus na mapagbigay sa lahat ng mga biyayang, aming natanggap. Alam namin na kung wala Ka, hindi kami magkakaroon ng sapat na mga bagay, na aming ikabubuhay. Sa araw na ito, kami po ay nagpupugay sa iyong banal na Pangalan. Kami po ay humihiling, na sana ay magkaroon pa kami, ng lakas at tibay ng loob at katawan, upang malaban ang masasamang gawain, na syang sumisira sa aming pagkatao. Sana'y bigyan mo kami ng kapayapaan, upang maghari ang iyong kalooban sa aming mga puso at diwa.

Panginoong Hesus, pagtibayin mo ang samahan ng aming pamilya. Alisin mo ang inggit. Tanggalin mo ang masasamang hangarin ng aming kapwa, upang mai-layoh naman kami, sa anumang kapahamakan na maaaring mangyari sa amin. Bantayan at gabayan mo kami, sa loob ng buong isang taon na darating.

Inaalay namin sa iyo, ang aming mga kaluluwa. Mapagtibay nawa namin ang aming mga prinsipyo, at pananampalataya.

Amen

Sisindihan ang puting kandila

PAGNINILAY AT PAGBABAHAGINAN

Sasagutin ng bawat miyembro ng pamilya

Anu-ano ang mga ipinagpapasalamat mo ngayong Pasko?



www.katolago.com | www.facebook.com/katolago

ADBIYENTO

Rito ng Pagsisindi ng kandila sa Korona ng Adbiyento para sa Pamilya

UNANG LINGGO: Pag-asa

+ Sa Ngalan ng Ama at ng Anak at ng Espiritu Santo. **Amen.**

Mga minamahal, sinisimulan natin ngayon ang Panahon ng Adbiyento. Buksan natin ang ating mga puso sa paghahanda natin sa pagdating ni Hesus sa ating mga buhay at tahanan. Ang mga kandila ng Adbiyento ang magpapa-alala sa atin na pumarito si Hesus upang pawiin ang dilim ng kasalanan at tanglawan tayo ng liwanag na walang hanggan. **Amen.**

PAGBASA NG SALITA NG DIYOS (Mateo 1:18-25)

Ang Mabuting Balita ayon kay San Mateo

Tugon - **Papuri sa'Yo Panginoon**

Ganito ang pagkapanganak kay Hesukristo. Si Maria na kanyang ina at si Jose na nakatakda nang pakasal. Ngunit bago sila nakasal, si Maria'y natagpuang nagdadalang-tao. Ito'y sa pamamagitan ng Espiritu Santo. Isang taong matuwid itong si Jose na kanyang magiging asawa, ngunit ayaw niyang mapahiya si Maria, kaya ipinasiya niyang hiwalayan ito nang lihim. Samantalang iniisip ni Jose ito, napakita sa kanya sa isang panaginip ang isang anghel ng Panginoon. Sabi nito sa kanya, “Jose, anak ni David, huwag kang matakot na tuluyang pakasalan si Maria, sapagkat siya'y naglihi sa pamamagitan ng Espiritu Santo. Manganganak siya ng isang lalaki at ito'y pangangalanan mong Hesus, sapagkat siya ang magliligtas sa kanyang bayan sa kanilang mga kasalanan.”

Nangyari ang lahat ng ito upang matupad ang sinabi ng Panginoon sa pamamagitan ng propeta:

“Maglilihi ang isang dalaga at manganganak ng isang lalaki, At tatawagin itong “Emmanuel,” ang kahuluga'y “Kasama natin ang Diyos”.

Nang magising si Jose, sinunod niya ang utos ng anghel ng Panginoon; pinakasalan niya si Maria. Ngunit hindi ginalaw ni Jose si Maria hanggang sa maipanganak nito ang isang sanggol na lalaki na pinangalanan niyang Hesus.

Ang Mabuting Balita ng Panginoon.

Tugon - **Pinupuri Ka namin, Panginoong Hesukristo.**





PANALANGING PANGKALAHATAN

Si Kristo ay pumarito upang hanguin tayo sa dilim ng kasalanan at nangakong muling babalik. manalangin tayo upang tayo ay laging maging handa na tanggapin siya. Tugon - **Halika, Panginoong Hesus.**

Upang mabuksan ang ating mga puso sa pag-ibig ng Diyos ngayong Panahon ng Adbiyento, Manalangin tayo sa Panginoon. (Tugon)

Upang tanglawan at pagtagumpayan ng liwanag ni Kristo ang kadiliman ng kasalanan, Manalangin tayo sa Panginoon. (Tugon)

Upang ang korona ng Adbiyento ay patuloy na maging paalala sa atin na maghanda para sa pagdating ni Kristo, Manalangin tayo sa Panginoon. (Tugon)

Upang sa panahon ng Pasko ng Pagsilang ng Panginoon ay mapuno tayo ng kapayapaan at kagalakan sa pagsisikap nating tularan si Hesus, Manalangin tayo sa Panginoon (Tugon)

Banggitin ang natatanging panalangin para sa inyong pamilya. (Tugon)

Sa tagubilin ng mga nakagagaling na utos at turo ni Hesus na Panginoon natin at Diyos, ipahayag natin nang lakas-loob, **Ama namin...**

PANALANGIN NG PAGBABASBAS

Ama naming mapagmahal, pinasasalamatan Ka namin sa pagsusugo Mo ng Iyong Anak na si Hesus; Siya ang Emmanuel, ang pag-asa ng lahat ng tao; Siya ang karunungan na gumagabay at humuhubog sa atin; Siya ang Tagapagligtas ng lahat ng bansa. Pagpalain Mo kami sa pagsisindi namin ng mga kandila ng Korona ng Adbiyento. Nawa ang liwanag nito ang maging tanda ng pangakong katubusan Kay Kristo.

Hinihiling namin ito sa pamamagitan ni Hesukristo kasama ng Espiritu Santo magpasawalang hanggan. **Amen.**

Sisindihan ang Unang kandila (lila) sa Korona ng Adbiyento

PANGWAKAS

Nawa'y patnubayan ng Liwanag ni Kristo tungo sa kaganapan ng Kanyang Kaharian magpasawalang hanggan. **Amen.**

PAGNINILAY AT PAGBABAHAGINAN

Sasagutin ng bawat miyembro ng pamilya

Ano ang ipinagdadal mo ngayong Pasko?

IKALAWANG LINGGO: Pag-ibig

+ Sa Ngalan ng Ama at ng Anak at ng Espiritu Santo. **Amen.**

Kapuri-puri na tumatanglaw sa ating mga puso ngayon at magpasawalang hanggan. **Amen.**

PAGBASA NG SALITA NG DIYOS Marcos 1:1-8

Ang Mabuting Balita ayon kay San Marcos.

Tugon - **Papuri sa'Yo Panginoon**

Tuwirin ninyo ang mga landas ng Panginoon.

Nagsimula ito noong matupad ang hula ni Propeta Isaias:

“Narito ang sugo ko na aking ipadadalang mauuna sa iyo, ihahanda niya ang iyong daraanan.” Ito ang sabi ng isang sumisigaw sa ilang: “Ihanda ninyo ang daraananng Panginoon, tuwirin ninyo ang kanyang mga landas!”.

Ang Mabuting Balita ng Panginoon.

Tugon - **Pinupuri Ka namin, Panginoong Hesukristo.**

PANALANGING PANGKALAHATAN...

(Sanggunihin ang unang Linggo ng Adbiyento)

PANALANGIN NG PAGBABASBAS

Ama naming Makapangyarihan at Maawain, Sa aming pagsalubong sa Iyong Anak Huwag Mong ipahintulot na maging hadlang ang aming mga pinagkakaabalahan.

Turuan nawa kami ng Kanyang

karunungan upang kami ay

Kanyang makapiling kasama Mo

at ng Espiritu Santo

magpasawalang hanggan. **Amen.**

Sisindihan ang ikalawang kandila (lila) sa Korona ng Adbiyento



PANGWAKAS

Nawa'y patnubayan ng Liwanag ni Kristo tungo sa kaganapan ng Kanyang Kaharian magpasawalang hanggan. Amen.

PAGNINILAY AT PAGBABAHAGINAN

Sasagutin ng bawat miyembro ng pamilya

Para kanino mo iniaalay ang pag-ibig na handog ng Panginoon?

IKATLONG LINGGO: Kagalakan

+ Sa Ngalan ng Ama at ng Anak at ng Espiritu Santo. **Amen.**

Kapuri-puri na tumatanglaw sa ating mga puso ngayon at magpasawalang hanggan. **Amen.**

PAGBASA NG SALITA NG DIYOS (Juan 1:6-8, 19-28)

ng Mabuting Balita ayon kay San Juan.

Tugon - **Papuri sa'Yo Panginoon**

“Ako'y nagbibinyag sa tubig, ngunit nasa gitna ninyo ang isang hindi ninyo nakikilala. Siya nag susunod sa akin, subalit hindi ako karapat-dapat magkalag man lamang ng tali ng kanyang panyapak.”

Ang Mabuting Balita ng Panginoon

Tugon - **Pinupuri Ka namin, Panginoong Hesukristo.**

PANALANGING PANGKALAHATAN...

(Sanggunihin ang unang Linggo ng Adbiyento)

+ PANALANGIN NG PAGBABASBAS

Ama naming makapangyarihan, Tunghayan Mo ang pananabik ng Iyong sambayanan sa Pasko ng Pagsilang ng Panginoon naming Mahal. Pasapitin mo kami sa kagalakang dulot ng Kanyang pagtubos at pagsiglahin Mo kami sa pagpapasalamat sa Iyong kaloob sa pamamagitan Niya kasama ng Espiritu Santo magpasawalang hanggan. Amen.

Sisindihan ang Ikatlong kandila (rosas) sa Korona ng Adbiyento

PANGWAKAS

Nawa'y patnubayan ng Liwanag ni Kristo tungo sa kaganapan ng Kanyang Kaharian magpasawalang hanggan. **Amen.**

PAGNINILAY AT PAGBABAHAGINAN

Sasagutin ng bawat miyembro ng pamilya

Ano ang nagbibigay sa'yo ng kagalakan?

